

a1^v

Dem leser heyl yn Chrifto Jefu Amen

CHriftenlicher Lefer/ wolleft dich nicht yrren laffen, Das
difer Lerer Cyprianus/ das wörtlyn Werck auch vergley-
chung vnd verdienft derfelben fo offft herfur czeücht. Dañ
er nicht deynfelbs werck meynet/ fonder das werck/ welchs eyn fru-
cht ift des glaubens/ der dir von Got mues gegeben werden/ wie
du felbft achten muft/ das folchs ym grūd feynes hertzen gemüt ge-
wefen/ Die weyl er den glauben an vilen orten treffenlich eyn grūd
des wercks fetzet/ wie du auß fleyffigem belesen difer Sermon (ha-
ftu anderft eyn verftād) befindet. Vnd fonderlich am dritten blat
do er fpricht/ Der glawb fey die gerechtikeit/ vnd das folch werck
auß rechter lieb vnd barmhertzikeit an dem nechften befchehe/ vñ
nicht von verdyenft wegen. Sonder wie vns Chriftus geliebt/ der
fich fur vns ynn tod gegeben/ als eyngang der Sermon vns eryn-
nert/ er lobt auch Abrahams glaubñ. In funa/ glaubftu feftiglich
das Chriftus fur dich geftorben/ on deyn verdyenft/ fo muftu yhn
lieben/ vnd alles thuftu willig was yhm gefellig. Vnd alfo alleyn
auß difer lieb die auß dem glawben entfpringet/ kumpt diß werck
des almufens/ vnangefehen eynicher belonung. Laffeftu aber deyn
gelincke handt wiffen was die gerechte thut/ vñ fucheft dich felbs/
vermeynende die feligkeit dardurch czu erlangen/ fonft wolteftu es
wol vnderwegen laffen/ So ift es keyn werck mehr des glaubens/
fonder des teüfels/ vnd haft deyn belonüg fchon empfangen. Dañ
du wilt dir felbft helffen/ mit dem fetzestü Chriftū mit feynem ley-
den hinder die thür/ Das kompt auß dem vnglauben der die höch-
fte fund ift. Dañ was auß dem glauben nicht ift/ das ift funde. Ro-
ma. xiiij. Aber der funden lohn ift verdamnyß. Hie neben ift meyn
brüderliche bitt du wolleft die Sermon Lutheri lefen/ von dem vn-
gerechten Māmon/ ynn welcher er die fchrifft czu den wercken rey-
tzende gar treffenlich vnd Chriftlichs verftands außlegt/ fchrifft
mit fchrifft. Liß vnd leb feliglich.

Mat. 6.

Deuteronomi. xv.

Es foll allerding keyn armer vnter euch feyn.